

Erich Bolinius  
[www.erichbolinius.de](http://www.erichbolinius.de)

### **(Bericht über den BSV Kickers Emden**

Sendung „Flutlicht“ auf Radio Ostfriesland

**Donnerstag, 9.1.2014 18.05 Uhr** auf 94.0 bzw. 87,7)

Moin, leev Toehörers,  
ik hoop, Ji sünd all goed in dat Neei Jahr komen. Mit 'n Bericht van 'n Punktspöl van Kickers Emden kann ik ja noch neet denen, is ja Winterpaus. Man van 'n paar Hallenturniere, de de Mannskupp van Kickers Emden wunnen hett, kann ik vertellen.

De eerst Turniersieg holte sük Kickers Emden in Borssum bi de Ralf-Bachmann-Cup in Borssum.

Ok de „32. Emder Hallenstadtmeisterschaft“ in de Nordseehalle vör insgesamt 2.400 Toekiekers was Kickers Emden neet toe slaan, wunn all Spölen. Un **Thilko Boekhoff** wurr noch mit 9 Toren een van de beiden „Torschützenkönige“.

Man in dat lesd Spöl tegen RSV Emden wurr dat noch maal heel spannend. Torwart **René Carstens** wurr toe 'n groot Held. Eerst harr he in dat Finaalspöl 'n Ball hollen, dann versenkte he – heel cool – mit 'n „Lupfer“ tegen de RSV-Torwart **Daniel Dietrich** dat Leer in dat Nett. Dorna meente he, dat he egentlik ok al in Borssum so harr sketen wullte, man dor harr he sük aber noch neet traut.

De „Interimstrainer“ **Manfred Wehe**, mit hum as Torwart hebb ik in Petjem –zig maal spölt, he is ja ansük de Torwarttrainer van Kickers Emden, was mit de Jungs heel un dall toefree. Un dat kunn he ok.

Kickers Emden haalte dormit 'n Tripple, umdat ok de B- un de C-Joegdmannskupp de OLB-Cup in de Nordseehalle haalten

Un ok in de vull besette Auerke Sparkassenarena, dor gung dat um de Auerk-Cup (Aurich-Cup), wunn Kickers Emden dat Turnier. Na 'n heel spannend un dramatische Endspöl wunnen de Jungs van Kickers Emden na 'n Negenmetersköten tegen de Vörjahrssieger SV Grootfehn (Großefehn) mit 4:2 Toren.

Na de regulär Spöltied wassen toerst de Fehntjers dör **Nico Sittenkopf** in Föhren gang. De Emders gleken dör **Tido Steffens** ut. Kört dorup skoot **Atilay Batbay** dat 2:1 für Kickers. As all in de Halle sük al dormit offunnen harren, leet Torwart **Carsten Buss** twee Sekunnen vör de Enn een harmlos Flegkoppball van **Bastian Dassel** dör. Buss was sotoeseggen an de „Boden zerstört“. Man Buss mook sien Fehler weer goed un leet keen Tor van Grootfehn mehr toe. Un sien Mannskuppskameraden drückten hum dorna so leep, dat he bold keen Lücht (Luft) mehr kreg. Ja, so kann man innerhalb van 'n paar Menüten van 'n Buhmann toe 'n Helden worden.

Kickers hett siet körtens mit **Markus Olbrys**, de van Riepe komen is, ok 'n neei Cheftrainer. He word ja van all Kanten düchtig lobt. Sien Höövdupgaav sücht he dorin, Kickers Emden för de Ofstieg in de Landesliga toe bewahren. In de komende Saison sall dann de Upstieg in Angrep nomen worden. Drücken wi hum de Dumen, dat dat ok all so klappt.

So, toe Schluss noch 'n Sprök van de Nationalspöler **Lukas Podolski**:  
„Nu mutten wi de Koppen hoogkrempeln. Un de Ärmels natürelk ok.“

So, leev Toehörers van Radio Oostfreesland,  
ik hoop, Joe hett dat Plattdüütsk gefallen, denn mien Motto heet ja alltied,

plattdüütsk dürt - nettso as Kickers Emden – neet unnergahn.

Bit anner Maal

Joe

Erich Bolinius ut Emden-Petjem.

.